

**MARA EVANGELICAL CHURCH**

**KRIZYHPA THYUTLIA PY**



**2023 KTP HÂTÂ CHHIHTHANA BU**

**BIEPIPA:**

**"HNEINA TA KRISTA A CHAKAOPA THYUTLIA" (Luka 8:3)**

Rev. San Lwin  
(Secretary, KTP)

**Mara Evangelical Church  
Krizyhpâ Thyutlia Py  
Hqrs. Sabawngpi**

***Copy Right @ 2023 by***  
**KRIZYHPA THYUTLIA PY**

***Design & Layout***  
San Lwin

***Author***  
Rev. San Lwin

***Copy: 200***  
**19 April 2023**

***Printing Press***  
**MEC Office, Sabawngpi**

***Published by***  
**Christian Youth Department**  
**Headquarter, Sabawngpi**

## ACHHÔHBIEZY

1	BIEHMIAPA	ii
2	HMOSAIPIEPA TA CHAKAONA	1-3
3	REITHAINA HLA TA CHAKAONA	4-6
4	HMO PIENA TA CHAKAONA	7-9
5	ACHYH CHAIPA CHÔ LIATA CHAKAONA	10-12
6	HMOPHA TAONA TA CHAKAONA	13-15
7	KEI CHÂTA VAW TAO TUA TEH!	16-18
8	HNEINA TA KRISTA A CHAKAOPA THYUTLIA	19-22



## BIEHMIAPA

2023 KTP Hâtâ Chhithana Bu patôpatiah awpa tovyuh ei to chanei vâta thata ei ly. ABeipa moh reithai nahta chakaolâhpa KTP sahlao zydua chô liata alyna bie ei reih. 2022 kô liana khata KTP Department ta 75 Jubilee vaw tlô haw ta, atahmâ Jubilee khô lâ eima chakâ pathao bâ. Diamond Jubilee & Seminar, Sabawngpi liata Jubilee khô lâ KTP chakao nawpazy ropadyna hneipa châ ta, atakô 2023 KTP Hâtâ & Aduanoh biepipa cha "Hneina ta Krista a Chakaopa Thyutlia (Luka 8:3)" tahpa atlypa a châ. He he a vaw y awpa kôszyzy liata KTP chakaona ropadyna chhao a châ.

Hâta ahmâna he thlahpa lâ apathiehna/apahrana châta hmâpa a châ vâta apakhyna y khao leipa aw ta, Awnanopa zawpi ahlao thei awpa zâ daihti 7:00-9:00 pm liata dawh parosapa ta, su raopa liata Chhithana Bu reina & reipahmaohna ta hmâpa a châ aw. Zâ to sôh thyuna y lymâ aw ta, hâta sôh nata Aduanoh sôh zydua cha a chatlie theina hawhta Office lâ paphaopa a châ aw.

ABeipa ta he châbu areituhpa nata atheituhpa zydua hnohta Ano chakao pazao thei aw ta, thatlôna byh nâ athiehpa ta miah baichha mawh sy!

Krista raihria liata,



Rev. San Lwin  
(Secretary, KTP)

<p style="text-align: center;"><b>3 JUNE 2023</b> <b>Saturday zâ</b></p>
--

## HMOSAIPIEPA TA CHAKAONA

(Ephesi 4:13)

### Biehmiapa

Khazohpa hmotaopazy hry liata mâ ahnei chaipa cha chyhsapa he a châ. Achhâpa cha Khazohpa kakuapa ta taopa eima châ vâta. Khizaw liata chyhsazy pi he eima hmisazy liata pakha nata pakha alyu ma pi. Mongyuhpa ama ypa hawhta movyhpâ ama y. Alaipa ama ypa hawhta achyhpâ chhao ama y hra. Chatlai cha Khazohpa khohzie châ ta, Khazohpa kuzô ta taopa sai eima châ. Khazohpa miah ataona chhâpa cha Ano palyupalih awpa nata chakao awpa he a châ. Cha cha chyhsa hmia tuapa Adâh nata Ivy liata a pathao. Chavâta miah Taotuhpa Khazohpa chakao awpa he chyhsapa ta ahneipa maohphaona lai chaipa a châ. Atazâ liata eimâ chu awpa cha "Hmosaiepa ta Chakaona" tahpa a châ aw.

### Achhôhbie

Athaona châbu liata chyhsapa taona thâti h eima hmô. Khazohpa ta, "Keimo kakuapa ta, keimo hawh tlaita chyhsapa tao ei sila" a tah (Athaona 1:26). "Keimo" tahpa hawrawh hmâpa châ ta, a yzie cha "Sâkha hlâta hlüh viapa" tahna a châ. Cha cha "Manoh pathôh pôhkha Khazohpa (Paw, Sawchapawpa, Thlahpa Pathaihpâ)" reichakina a châ.<sup>1</sup> Khazohpa kakuapa ta taopa eima châ tah ti ta, Khazohpa châna zydua eimâ hlykhai/hnei khai tahna châ hlei vei. Khazohpa cha Thlahpa châ ta (Zawhana 4:24), keimo cha pôhpa eima châ. Chavâta Khazohpa kakuapa tahna yzie cha "Hrozie nôchâ liata kyhpachâna, palôhpasina, ngiathaina, nôphana, ngâchhihna hpz... hneina" he a châ. Khazohpa kakuapa ta taopa

---

<sup>1</sup> *The Life Application Study Bible* (Grand Rapids, Michigan: Zondervan Publishing House, 2005), p. 6.

eima châ vâta keimo sasyh a reipachhiena nata a pahnaisana cha Khazohpa reipachhiena nata pahnaisana châ ta, Khazohpa ta maniah a piepa hrozie nôchâ zy reipachhiena a châ. Chavâta eima châna (Hmisa, pôh raoh, movyh, mongyuh hpz...) he alykhei cheingei awpa a châ.

Khazohpa ta Ano ta ataopa chyhsazy cha Ano hrozie, nôchâ zy a pie hlei khô ta, Ano angiapâtuha zydua hnohta Thlahpa hmosaipepa (Spiritual Gift) â nano nano ta miah a pie (Ephisi 4:13). Cha cha Ano chakao nawpa châta miah a piepa châ ta, thokhazy cha apôstôlzy, hrohsopazy, thâtihpha chhotuhpazy, Awnanopa pasatuhpazy, pachutuhpazy hpz...ta miah arao. Sapa nata thlahpa hmotaotheina ânanona he arylâ liata eima palâsa aw.<sup>2</sup>

<b>SAPA NATA THLAHPA HMOTAOTHEINA PAKHOPÂNA</b>		
<b>PAKHOPÂNA (Comparison)</b>	<b>SAPA HMOTAOTHEINA (Talent)</b>	<b>THLAHPA HMOSAIPEPA (Gift)</b>
<b>Ahnawh (Source)</b>	Khazohpa tawhta nôpaw chapiapa ta topa a châ.	Khazohpa tawhta nôpaw chapia leipa ta topa a châ.
<b>Hneina (Possessed)</b>	Pihna tawhta topa a châ.	A pathlaina tawhta topa a châ.
<b>Âchhuahna (Purpose)</b>	Sapa kao/duahmo (Natural Level) lâ tawhta zawpi phahnaina châta a châ.	Thlahpa kao/duahmo (Spiritual Level) lâ tawhta zawpi phahnaina châta a châ.
<b>Chhichâna (Process)</b>	Pahnokhei awpa, palaiseihsa awpa, patliepatlâsa awpa â byuh!	Pahnokhei awpa, palaiseihsa awpa, patliepatlâsa awpa â byuh!
<b>Phahnaina (Function)</b>	Ngiapâtuhpazy ta Ano hmâtlâh nata rônahna châta Khazohpa lâ hlâ awpa a châ.	Khazohpa rônahna châta hmâ awpa a châ.

<sup>2</sup> Paul Enns, *The Moody Handbook of Theology* (Chicago: Moody Press, 1989), p. 281.

Mara Awnanopa chhao he thâthipha bie areithaipa, chhithatuh phapa, sôh a mohôh thaipa nata ahneirôhpa hpz... ahnei hlüh kaw. KTP liata chhao thaina sona ahneipa nata kuzôthaina ahneipa zy ama y hlüh kaw hra. Anodeikua thyutlia thokhazy cha Khazohpa ta miah a piepa hmosai he chakaona châta hmâ vei ei. Hmosaipiepa he Khazohpa tawhta eima hmôpa châ ta, Ano chakao nawpa ta eima hmâ vei khiah, chi âchhih ngâsâ. Sasawna cha thatlôna piepa châ ta, Izarel sawzy Philistina mozy tawhta pachha awpa a châ. Châhrasala, a thatlôna cha Khazohpa chakaona châta ahmâ thai khao leipa vâta ano hrona chhao â pahleipâ haw.

### **Biepachhâna**

Zibeipa a sie chy ta, a sei pathôzy hnohta sôh a pavaosa. Sei pakha hnohta talent miapangawh pie ta, sei hropa hnohta miano pie ta, sei hropa hnohta miakhâ a pie. Miapangawh a topa nata miano a topa zy chata ama talent cha papôhsa ei ta, miakhâ a topa deikua papôhsa khao leipa ta a so thlâhâ. Zibeipa avaw tlô nahta miapangawh a topa nata miano a topa zy hnohta "Sei phapa nata ngâchhihpa, na tao pha na, hmo chyhta chô liata ngâchhih chi ta, a hlühpi chô liata ei cha pa ysa aw" (Mathai 25:21) a tah. Miakhâ a topa deikua cha "Thathipa na châ" tah ei ta, a talent hnei chhôhpa chhao cha chhu ei ta, sei hropa panozy hnohta piepa a châ haw. Eima hnei chhôhpa hmosaipiepa he ABeipa châta hmâh pha suh vy!

### **REIPAHMAOHNA**

- 1) Hmosaipiepa nanopazy paziah teh!
- 2) Hmosaipiepa hry liata MEC Awnanopa ta eima pasâhsa chaipa he khâpa hmosaipiepa he ma a châ aw? Khâpa vâta e?
- 3) Chakaona liata diathlâna chi âchhihzie rei pasia teh!



<p style="text-align: center;"><b>4 JUNE 2023</b> <b>Sunday zâ</b></p>
--

## REITHAINA HLA TA CHAKAONA

(1 Thatizy rona 16:23-25, Hlazy 96:1-4)

### **Biehmiapa**

MEC Awnanopa liata eima duahmo pasâh awpa angiah kawpa miakhâ cha reithaina hla ta chakaona he a châ. Reithaina hla sana he ngiapâtuhpazy ta lei lia dei châ leipa ta vârah liata chhao eima tao pazao lymâ awpa Khazohpa chakaona chhaichhi miakhâ a châ. Lei mozy ta reithaina hla ta Khazohpa palyuplih ei ta, vâ mozy chhao chho nata zâ achalih leipa ta ABeipa cha ama reithai. MEC Awnanopa chhao reithaina hla sana he Krista Thâtihpha chhona nata Khazohpa khinarâh paduana châta ahmâ lymâ awpa chhaichhi a châ. Chavâta atazâ liata eimâ chu awpa cha reithaina hla ta chakaona tahpa a châ aw.

### **Achhôhbie**

Reithaina hla nata Music he khâcha azaona ahnei. Khizaw liata Music a vaw pathaotuhpa cha Zubal châ ta, ano he Kaina pathlazy hry liata tahpa Lameka sawchapawpa a châ (Athaona 4:20-21). Music (Pyungiapa) he Izarel mozy achhyna nata kyhchhi liata peimawh ngaitapa chhaichhi a châ.<sup>3</sup> Reithaina hlasana he kyhpachâna nata alyna palâsa châ ta, reihkah ta biechhupa taopapauna a châ. Thokhazy ta Mawsi hla he khizaw liata rochiehpa hla paroh chaipa a châ ama tah (Puasaina 15:1). Izarel sawzy cha Izi râh seichâna liata kô 430 chhôn vaw y ei ta, Mawsi chhihthapa ta Izi râh cha puasaipa ta tilaipi saiha ngiakâh liata Khazohpa lâta reithaina hla ama sa. Cha cha seichâna Izi râh puasaina vâta Khazohpa lâta alyna hla a châ. Izarel beipa Davi nata Sawlawma

---

<sup>3</sup> *The Life Application Study Bible*, p. 118.

chhao he reithaina hla a pahâpazy ama châ hra. Zerusale achhyna-o chhao cha Music achuna su lâta ama vaw hmâ hra.

Reithaina hla sana he chariahpa adyuhna chhaichhi miakhâ a châ. Zawsua nata Izarel sahlaozy mietaku tôpa ki nata chiami tôpa zy pyu hmâpa ta ABeipa ta Zerikô ku cha pachosa (Zawsua 6:1-27). Zudah beipa Zehosapha ta ano a dyuh awpa ta a vaw puapa Moaba pathlazy nata Amawna pathlazy a vaw pahniena chhaichhi cha reithaina hlasana he a châ (2 Thâtihzy Rona 20:1-31). Moaba pathlazy nata Amawna pathlazy cha Zudah mozy adyuh awpa ta ama vaw pua no ta Zubah beipa Zehosapha ta hla asatuhpazy rao ta, amo chata ABeipa reithaina hla sa lymâ ei ta, ama chariahpazy cha amo sasyh ta amâ pahleipadia haw. Hla asa awpa ta ama raopazy he thyutliazy ama châ aw ei. ABeipa reithaina hla sapa he chariahpazy pahniena chhaichhi rônah ngaitapa a châ tahpa he liata eima hmô. Pawla nata Sila lô-o liata amâ tâh nota reithaina hla vâta lô-o avaituhpa taih ama papipathisa haw (Hmotaopazy 16:25-33).

ABeipa ngiachhiena vâta Mara sawzy byhnâ to kaw pi ta, ao-reih phapa thyutliazy eima hnei hluk kaw. Thokhazy deikua ama ao-reih phapa cha Khazohpa chakaona châta hmâ leipa ei ta, apalaina lâtazy, mopakha nohâhna lâtazy tla ama hmâ. Pei ngâsâ. Ao nah reih phapa eima hneipa he Khazohpa ta miah a piepa a châ vâta Ano chakaona châta eima hmâ awpa a châ. Khazohpa bie ta, "ABeipa nama Khazohpa cha nama pathipalôh tlokhuh ta, nama palôhrupa tlokhuh ta, nama thatlôna tlokhuh ta, kyh nama pachâ awpa a châ" (Ryhpachaneina 6:5) a tahpa hawhta hla eima sa tita, palôhrupa ta sa awpa âbyuh. Palôhrupa tlokhuh ta hla eima sa tita, atheipazy palôhrupa liata Khazohpa ta rai ahria tyh.

Reithaina hla liata solo (mo pakha), duet (mo pano), trio (mo pathôh), quartet (mo pa palih), group song (pykha), choir (hlapy), zawpi reithaina zy âhlao. Reithaina hla he mo hluphi nata mo chyhta chhao taotheipa a châ nota Local KTP chhituhpa thokhazy

cha hlapy ama padua thei leipa chhao he pei tah vei ei. Paduah thei nawpa lâthlô chhao pachâ hlei vei ei. Local KTP aduah thlâhâ pi ta, hlapy eimâ duah thei leipa cha chakaona liata hmakhâ (1 mark) eima pahlei haw tahna a châ. Central KTP ta Burma Mararâh liata Music Studio a vaw paduana chhâpa chhao cha reithaina hla ta Krista Thâtihpha chho khohna nata khinarâh padua khohna vâta a châ.

### **Biépachhâna**

Ato zydua he adaihti ahneipa a châ. Reithaina hla sana chhao he daihti ahnei. Sapa thatlôna, palôhrupa thatlôna nata ao thatlôna zy he eima thyutliana daihti he a châ. Eima thyutliana daihti akhô khihta cha eima sapa thatlônazy thazeih aw ta, eima palôhrupa thatlônazy lei via aw ta, eima ao nah reih zy chhao arao hra aw. Cha daihti liata cha eima thyutliana daihti he kuahnao thaipa châ khao aw vei. Eima ao thatlôna daihti liana heta reithaina hla sa via sila, Krista khinarâh a kaw via lymâ aw. Reithaina hla ta chakaona liata thyutliazy arâpasua lymâ suh vy!

### **REIPAHMAOHNA**

- 1) Love Song he moleina a châ ma/ vei ma? Nâmo hmôna hawhta rei pasia tua teh!
- 2) Reithaina hla ta Krista Thâtihpha eima chho thei nawpa ta Local KTP ta kheita eima hriapazih aw?
- 3) Nama Local KTP heta kôkha liata hla (1) chhâh Music Video ta tao cheingei awpa a pha na tah ma? Zawpi palôh phaoh saipa ta biechhawna nama taothei aw ma?

<p style="text-align: center;"><b>5 JUNE 2023</b> <b>Monday zâ</b></p>
--

## HMO PIENA TA CHAKAONA

(Biesozy 3:9-10, 18:16)

### Biehmiapa

Hmo piena he Khazohpa tawhta a thaopa a châ. Khazohpa ta a Sawchapawpa Zisu Krista cha khizaw lâta a vaw tua. Cha cha khizaw chyhsazy châta Khazohpa hmopie rônah chaipa a châ. A Sawchapawpa miah a pie hlei khô ta, noh to hro liata eima pao lei nawpa ta Thlahpa Pathaihpâ miah a pie. Keimo chhao Khazohpa tawhta eima daopa byhnâzy he mohropa pie hra awpa a châ. Khizaw liata ahneirôhpa hluhpi y ei ta, ahneirôhpa thokhazy ta ama hmo hneipazy cha amo thatlôna nata taotheina vâta hmôpa nata hneipa hawhta ama pachâ. Thokhazy heih cha Khazohpa lâ byhnâ hiah pi ta, eima hmô nata byhnâ miah a pietuhpa Khazohpa eima my haw tyh. Khizaw liata hneirôhna zydua he Khazohpa ta miah a piepa a châ vâta miah a pietuhpa Khazohpa my lei awpa he peimawh ngaitapa a châ.

### Ahhôhbiezy

Khazohpa lâta hmo piena he Khazohpa cha byhnâ hnawh a châ tahpa palâhâna a châ. Izarel mozy cha kô 40 chhôn râhpathopa liata lyu tao lei, sahdô tao lei vaw sie ei ta, châhrasala niena do kyh liata a phahlapa beih vei ei. Khazohpa ta Izarel mozy angiahna pahno ta, hrona mâna a pie ei (Puasaina 16). Khazohpa ta Ano ta âtlypa Izarel sawzy cha Kana râh amâ ngia chyhta liata he hawhta bietâna a hnei ei. "He eima sôh zy he, keimo thatlôna nata eima ku taotheina a châ, nama palôruhpa ta nama tah pathlei aw na" (Ryhpachanei 8:17). He bietâna he Kana râh liata byhnâ ama to pha via nawpa bie rônah ngaitapa a châ. Khizaw liata hmo eima hneipa zydua he keimo thatlôna nata taotheina vâta eima hneipa châ tla

leipa ta, Khazohpa ta maniah a piepa deita a châ. Abei Sawlawma cha Izarel beipa châ awpa ta a châ nota Khazohpa lâta sona a hia. Khazohpa ta sona zydua cha pie ta, hneirôhna chhao a baichhapâ (1 ABeizy 3:12-13). A yzie cha sona nata hneirôhna cha Khazohpa tawhta eima hmôpa châ ta, byhnâ zibeipa cha Khazohpa tahna a châ.

Naba cha Maôn khih liata a pahrâpa châ ta, chyhsa hneirôh ngaitapa a châ (1 Samauel 25:2). Alapinô moh cha Abikai châ ta, chanô ngaitapa a châ hra. Naba deikua cha nôchhie ngaitapa nata molei ngaitapa a châ. Abei Davi ta Naba hneirôhna cha pahno ta, a sahlaozy tuapa ta "Na hneipa hawhpa maih cha na chakaotuhpa zy nata na sawchawpawpa Davi he vaw pie mah y" (1 Samuel 25:8) tahpa a chho. Anodeikua Naba cha ahneinazy a pasaih leipa vâta thie awpa duasu liata a vaw y thlâh haw. Alahpinô Abikai vâta thi awpa tawhta âboh.

Biehraï Thiehpa liata satlia ahneirôh kawpa nata Zisu atyhna eima hmô. Satlia hneirôh kawpa cha Zisu lâ a vy ta, "Pachutuhpa, tlyzaw hrona ei hnei thei nawpa ta khâpa e, ei tao aw" a tah (Mathai 19:16-22). Zisu ta satlia hneirôhpa hnohta hrona liata nâ ngia khoh khihtala, a biepiepazy a pyh teh tahpa ta â chhy. Zisu ta Biehraï Parohpa liata biepiepa sacharu (6) la papuapa ta â chhy.

- 1) Liahny na chei awpa châ vei
- 2) Nâ pheï awpa châ vei
- 3) Na paru awpa châ vei
- 4) Chyhsa na leih awpa châ vei
- 5) Na nô nata na paw palyupalih teh
- 6) Nâma kyh nâ pachâpa hawhta na vaihzy kyh na pachâ awpa a châ (Puasaina 20:12-16).

Satlia hneirôhpa ta hezy he ei hawti no tawhta ei zyh paki haw tahpa ta riapha kawpa ta â chhy. Zisu ta "Hmo sâkha nâ pahla" tahpa ta a reih (Maka 10:21). A yzie cha satlia hneirôhpa he

a pha paki nawpa ta hmo sâkha â phahla tahna a châ. Zisu ta pha paki awpa ta hmo sâkha kyh thoh lâta a chho. Chazy cha;

- 1) A hneina zydua zuah awpa
- 2) A sôh dyhchhiepaзы pie awpa
- 3) Ano pazi awpa

Chhâzaw hrona hnei nawpa nata pha paki awpa ta Zisu ta a pahnosapa cha a pyh thei leipa ta, pachârôh ngâsâpa ta a siesai syulyu haw. A hneirôh kawpa vâta Zisu ta âhnawpa zyd cha tao thei khao vei.

### **Biepachhâna**

Khizaw liata byhnâ atlaichhai chaipazy he Mara sawzy eima châ thlyu aw. Byhnâ to khoth kaw taraw pi ta, hmo piena eimâ phahla kaw. Burma râh liata thâtihipha chhona liata moh aluah kawpa Rev. David Lah ta cha "Mara sawzy byhnâ nama to thai leina chhâpa cha piena nama pahno leipa vâta a châ" a tah. Vaw pachâ tyh nata byhnâ eima to chyhna he piena eima thai leipa vâta a châ tlai aw tahpa ei palôh liata â vaw lâ tyh. Thokhazy hneirôhna cha sipasapazy mohnaona tiao a châ. Khazohpa bie ta pie teh u, piepa ta nama y aw a tah. Hmopie athaipazy ta byhnâ ama daoh rili aw.

### **REIPAHMAOHNA**

- 1) Raihria tiama kaw taraw ta, ahneirôh thai leipazy he khâpa vâta ma a châ aw ei?
- 2) Hmo piena eima thai leina chhâpazy paziah tuah teh!
- 3) Sipasana heta hmo piena miah a pakhâ ma? Hmo piena kyh liata hneirôhna âbyuhzie reipasiasa teh!

**6 JUNE 2023**  
**Tuesday zâ**

## ACHYH CHAIPA CHÔ LIATA CHAKAONA

(Mathai 25:40, Luka 10:25-37)

### **Biehmiapa**

Chyhsapa cha mohropa baona angiah leipa pakhata hmah y ma pi. Sipasapa chhao mohropa baona ângiah ta, hneirôhpa chhao mohropa baona ângiah pyly. Achhâpa cha eima pahrâna khizaw liana heta tlâhlei-chiehleinazy, nodi-dâhphinazy, thazeih-thachhânazy, nôpo pachârohnazy nata thina mâchhiesana zy eimâ tyh lymâ. He rairunazy heta sipasa viapazy miah pathlua leipa ta, hneirôh viapazy pathlua hra vei. Chyhsa to eimâ tyhpa nata eimâ tyh lymâ awpa a châ. Cha hawhpa daihti liata eimâ ngiah chaipa cha mohropazy he a châ. He vâna heta Zisu ta achyh chaipa chô liata hmo pha tao awpa âbyuhzie miah a chhopa a châ.

### **Achhôhbie**

Bei Zisu ta "Ei unawhpa chyh chaipazy hro liata pakha chô liata nama taopa cha, ei chô liata a taopa nama châ" (Mathai 25:40) a tah. He liata pachâ peimawhpa cha "Chyh chaipazy" cha ahyzy ma ama châ tahpa he a châ. Thokhazy ta Zunawhzy ama châ ama tah. Thokhazy ta ngiapâtuhpazy ama châ ama tah. Thokhazy heihta su to liata a ypa bao angiahpazy ama châ ama tah. Achyh chaipazy he ahyzy ma ama châ tlai tahpa novâh âchhih thei nawpa ta arylâ liata eima mopazihna eima hnei aw.

Biehraï Parohpa daihti liata achyh chaipazy cha nohmeipazy ama châ. Hrosohpa Mika daihti liata ryureituhpazy ta ao-hrao ngaita ei ta, ama rakhô liata amâ zia ngâ no tlai heta nohmeipa o nata lyu hmozy chhu awpa ama pachâ (Mika 2:1-2). Nohmeipazy o nata lyu zy cha ama biehneina hmâpa ta ama chhu tyh. Nohmeipazy ta reikheituhpa ama hnei leipa vâta nôpo vâsâh ama tao ngaita kaw.

Chavâta Biehraï Parohpa liata cha nohmeipazy he achyh chaipa duasu liata a ypa ama châ.

Biehraï Thiehpa daihti liata achyh chaipazy cha Zenitaipazy ama châ. Zunawzy ta Zu chyhsa ama châpa cha thata a palaikhei ei ta, Zenitaipazy cha i tlu chhao sawta rei leipa ei ta, ama mohnao ngaita kaw. Krista pachhana Thâtihpha chhao he Zuzy châ deita a châ tahpa pachâna vâta Zenitaipazy cha ama mohnao ngaita kaw! He vâna heta Kana chanô ta Zisu lâ a vy ta, a sawchanô ahripa ta a patupa patlâh aw ta âhawna liata Zisu ta "Sawzy viachhâ chhu ta, izy hnohta thypa cha yzie châ vei" a tahpa kha a châ ngyu aw (Mathai 15:26). Zisu deikua Zenitaipazy pathlua leipa ta, moleipa chaipa Zakia o chhao aly kawpa ta tlô ta, Kana chanô sawchanô chhao ahripa patuna tawhta a patlâh heih.

Burma râh liata cha khihsatôtuna liata riethei sipasa viapazy he achyh chaipazy ama a châ aw ei. Ahneirôhpazy ta o nata lyu phapa nata niebaw tiah lei hnei ei ta, khihsatôtuna liata sipasapazy deikua cha o nata lyu cha rei leipa ta niebaw dadei chhao hnei vei ei. Chavâta Burma râh cha ryureina chhao he ahneirôhpazy bieheina ta tla a sie lymâ. Chin State liata MP (Member of Parliament) achhu awpa chhao he thaisona adaih kaw hra sila, sipasapazy châta cha aru ngâsâ. A yzie cha Burma râh cha ahneirôhpazy deita su hnei thei ei ta, asipasapazy châta su y vei tahna a châ.

Marasawzy chhao pi he Burma râh liata a pahrâpa châ pi ta, Burma phoryhpa ta bie miah a hnei kawpa ta ei pahno. Ahneirôhpazy bao awpa he phaohau kheï kaw pi ta, châhrasala khihsatôtuna liata sipasapazy bao awpa cha eima phaohri kheï kaw tyh hra. Hezy vâna heta KTP thyutona "SK & LK" daihti liata tlâhleïchiehleipazy mohôhna, bao byuhpazy baona, lyu vah kheina, lyu thlyu kheihna, sah phao kheina, tho phao kheihna hpz... he thyutliazy chakaona tôpipa ta ama vaw hmâpa a châ ngyu aw. KTP ta a hnei tuapa bievaopa cha "Na ku ta hriapa a hmôpa maih cha, na



hria theipa hawhta hria teh (Biechhotuhpa 9: 10) tahpa a châpa hawhta ama raihria chaipa chhao khitlâh ku nata pheï châna zy he a châ.<sup>4</sup> Atanoh daihti liana heta Local KTP thokhazy ta khitlâh ku nata pheï châna liata tiama hmeiseih ei ta, thokhazy deikua hezy hela hlâno daihti liata chakaona-na a châ bao a tahpazy chhao ama y hra.

### **Biepachhâna**

Zisu ta cha tahmâ bawlaw ta bao angiahpa chyhsazy he achyh chaipazy ama châ tahpa Samari chyhsa phapa chakaona liata miah a chho (Luka 10:30-37). Burma râh raonazy vâta siepasapazy chhao riethei tao ei ta, hlâno ta ahneirôh viapa eima tahpazy chhao cha riethei ama tao lylia hra. Thokhazy cha ama o nata lyu liata pahrâ thei khao leipa ei ta, riapaipa duahmo chhao ama vaw tlô. Chavâta Burma râh riarina daihti liata cha riapaipazy he achyh chaipazy tah theipa ama châ hra. Zisu ta "Ei unawhpa chyh chaipazy hro liata pakha chô liata nama taopa cha, ei chô liata a taopa nama châ" (Mathai 25:40) a tah. A yzie cha achyh chaipazy chô liata eima chakaona cha Khazohpa chakaona a châ tahna a châ.

### **REIPAHMAOHNA**

- 1) Khâpa vâta e sipasa viapazy bao awpa hlâta ahneirôh viapazy bao awpa eima khoh tyh?
- 2) SK, LK daihti liata chakaona dâh he atahmâ daihti liata ahmie khao leipazy a y ma? Khâpazy he maw hria pazao awpa pha aw?
- 3) Atahmâhlâ Mararâh liata achyh chaipazy he ahyzy ama châ aw? KTP heta amozy he kheita eima deichhy thei aw ei?

---

<sup>4</sup> Nôhro, *Krizyhpâ Thyutlia Py Thâtih* (Aizawl: 2000), p. 36.

<p style="text-align: center;"><b>7 JUNE 2023</b> <b>Wednesday zâ</b></p>
---

## HMOPHA TAONA TA CHAKAONA

(Biesohzy 18:16, Zawhana 20:35)

### Biehmiapa

Marapa chipho he hmopha taona liata a phahla kawpa chipho sâkha eima châ tah sila, reichhei thlyu aw ma pi. Kri eima vaw zyh tawhta atahmâ kô 116 (2023 liata) lâta vaw sie haw pi ta, Lai chipho (Chin) hry liata Biehraï ahnei tuapa chipho chhao eima châ. Anodeikua hmopha taona liata cha chipho hropazy hmiakô liata eima nawh ngâsâpa ta âlâ thlâh hâ chyh. Hmopha tao thai leina he sipasana vâta châ leipa ta palôh hawh leina nata kyhpachâna a pha hlana vâta a châ thlyu aw. Chavâta atazâ liata eimâ chu awpa cha "Hmopha taona ta chakaona" tahpa a châ aw.

### Achhôhbie

Khizaw liata zyhna py lai chaipa miapalih y ta, chazy cha Hindu (Hinduism), Buda (Buddhist), Muslim (Islam) nata Krizyhpazy (Christians) zy ama châ. He pypalih hry liata Hindu, Buda nata Muslim zy ta ama pasâhsa kawpa cha hmopha taona he a châ. Ama biepi chaipa chhao cha "Hmopha na tao khiah, hmophapa na to aw" tahpa a châ. Chavâta hmopha tao awpa he chakaona tovyuh rônah kawpa hawhta pachâ ei ta, sipasapazy baona, tlâhleï chiehleipazy deichhyna, bao ngiahpazy baona zy he ama tao lymâ. Keimo ta eimâ hnia chaipa Buda nawzy chhochhi cha hmopha taona he pasâhsa kaw ei ta, hmohro ahneipa thokô râhkô zy pasô hmeiseih ei ta, ochhôn lâta a vaw ngiapa parih dadei chhao thie pasaih vei ei. Zyhna hropazy ta hmopha taona he vârah kiah kahmi chhâhchabih (Step) miakhâ hawhta ama pachâpa vâta hmopha tao he ai tah vei ei.

Hmopha taona heta hro abohna a châ. Hezakiah cha Ahaza sawchapawpa châ ta, a sapa kô 25 liata Zudah beipa ta a vaw chakaopa a châ (2 ABeizy 18:1-2). Zudah beipa hluhpi hry ta Khazohpa khohzie ta ahropa nata hmo ataopa châ ta, Zudah bei ta a chakaona daihti liata hmopha atao tyhpa a châ. Nothlahpa achhynazy parao ta, Khazohpa achhyna a pahy heih (2 Thâtihzy rona 30). Ano chakaona liata ahlaotlohna chaipa cha Khazohpa liata âpahniehna he a châ. Nohkha cha thi daihmâpa ta pasa ta, hrosohpa Isai cha ano lâta a vy ta, a hnohta, "Na chhôhkha zy yzie awpa paryh teh, na thi aw, tlâh thei aw va chi" tahpa a chho (2 ABeizy 20:1). Hezakiah cha nôpo ngâsâ ta, Khazohpa aheihpa ta he hawhta thlah a chhâ. "Hy ABeipa y, na hmiakô liata hmeiseihpa nata pathipalôh phapakipa phaohpa ta ei y tyhpa zie nata na mohmô liata hmo phapa ei tao tyhna zie kha, ngiachhiepa ta athei thlâh hâ mah y" (2 ABeizy 20:3). Khazohpa ta hmopha ataonazy cha athei ta, athi awpa cha kô 15 hrona a baichha tahpa eima hmô.

Hmopha taona cha byhnâ tona a châ. Shuna chanô cha hneirôh kawpa châ ta, hrosohpa Elaisa kih a vaw tlyhna maihta a o liata patlôsa tyhpa chanô a châ. Khazohpa chyhsa siapa a châ tahpa pahno ta, a-o liata Elaisa yna su chhôhpadâh zy, rakhô zy, tlâkhai zy, dyuchhaizy, mei-ôh sonazy taopa ta, âchhuadyh tyh (2 ABeizy 4:10). Elaisa ta Shuna chanô âchhuadynazy cha hmô ta, âly ngaita kaw! Shuna chanô he hneirôh kawpa a châ vâta khizaw hmozy he peimawh chai ngyu aw vei. A chakaotuhpa Kehazi ta hneirôh kaw hra ei sala, saw ama hnei leipa nata a vahpa hra chata pawpi kawpa ta a châna ama hmô. Elaisa ta Shuna chanô châta byhnâ aw-hpâ ta, atahmâ ti ei vaw tlô heih tita cha sawchapawpa nâ pyh hra aw" (2 ABeizy 4:8-17) a tah. Elaisa byhnâ awna cha ABeipa ta chyh-eih ta, Shuna chanô cha sawchapaw a vaw hnei haw. Khazohpa chyhsa Elaisa chô liata a chakaona cha byhnâ rônah kawpa lâta a vaw lie haw.

**Biepachhâna**

Mara Awnanopa ta eimâ râpasua cheingei awpa miakhâ cha hmopha taona he a châ. Khazohpa a pahno leipa Buda zy, Muslim zy, Hindu zy hmah ta he tluta hmopha tao ama tiama no ta, keimo Krizyhpazy ta eima diathlâ ngâpa he pachâ peimawh hmeiseihpa a châ. Zudah beipa Hezakiah cha hmopha ataonazy vâta hropasina baichhapa a châ. Shuna chanô cha Khazohpa chyhsa Elaisa chô liata hmopha ataona vâta khizaw sôh nata piah ta chalei thai leipa sawchapawpa byhnâ ato. Khizaw liata eima hrochhôn liana heta hmopha sâkha chhâh tao suh vy!

**REIPAHMAOHNA**

- 1) Khazohpa pahno taraw leipa ta hmopha ataopazy he byhnâ ama to aw ma?
- 2) Chhônkhâ rai eima hria nota tiama kaw taraw pi ta, tlârai liata eima tiama thai leina he khâpa vâta e?
- 3) Hmopha taona vâta eima to awpa byhnâzy paziah teh!

<p style="text-align: center;"><b>8 JUNE 2023</b> <b>Thursday zâ</b></p>
--

## KEI CHÂTA VAW TAO TUA TEH!

(1 ABeizy 17:1-24)

### **Biehmiapa**

Khazohpa ta chyhsazy âtlypa ta khizaw liata chakaona rai a hria tyh. Biehrai Paroh liata theithaipazy nata hrosohpazy hmâpa ta chakaona rai hria ta, Biehrai Thiehpa liata Apôstôl zy hmâpa ta chakaona rai a hria. Atanoh daihti chhao Khazohpa ta Awnanopa liata chakaona rai hria awpa ta pastawzy, Awnano machâzy, kihhchhôn machâzy nata department liata chhithatuhpazy âtlypa ta chakaona raihria pazao. Cha Ano ta âtlypa chyhsazy deichhy awpa ta Khazohpa ta chyhsa nano nanopazy ahmâ lilaw. Chavâta Khazohpa rai cha chyhsa nano nanopa zydua pakaohpa ta hriapa chi a châ. Atazâ liata eimâ chu awpa cha "Kei châta vaw tao tua te!" tahpa a châ aw.

### **Achhônbie**

Zerepha khih he Mediterranean tilaipi ngiahkâ, Phoenicia râh, Tyre nahta Sidaw likawh liata a ypa châ ta, Izarel râh liata chakâhna a vaw tlô no ta hrosopa Elaiza a vaw pahrâna khih kha a châ. Izarel râh liata Ahaba âbeina daihti liata Khazohpa cha aheih saipa ta Baal khazohpa chakaona lâta ngiapâna lâpi ama pavia (1 Abeizy 16:31). Chavâta Khazohpa ta hrosohpa Elaiza cha Izarel chyhsazy lâta a tua. Izarel râh liata chakâhna ru ngaitapa a vaw tlô no ta Khazohpa ta Elaiza cha Zawda kiapâ liata a ypa Cheri vâtipa liata y awpa bie pie ta, Elaiza cha Khazohpa biepiepa hawh tlaita tao ta, cha vâtipa ti cha do ta, cha liata a y chhôn ta apasatuh awpa ta Khazohpa ta ra-awhzy tua ta, ra-awhzy ta my nata zâ maihta viachhâ nata sah a nie awpa cha ama vaw pie tyh. He liata pachâ awpa sâkha cha khâpa vâta ma Khazohpa ta pasi chhihpa ra-awhzy

he Khazohpa chyhsa a pasatuh awpa ta ahmâh tahpa he a châ. Theithaina châbu 11 liata ra-awhzy he nie lei awpa sazy liata ahlaopa châ ta, pasi chhihpa a châzie a palâsa. Châhrasala, Khazohpa ta pasi chhihpa hmozy cha mohropazy deichhy nawpa ta ahmâh lilaw.

Vâsua leina vâta cha râh liata chavâh ti zy cha kua khai haw ta, Khazohpa ta hrohsopa Elaiza cha Sidaw râh liata Zerepha khih lâta sie aw ta, bie a pie heih. Elaiza cha Zerepha khih lâna chata vaw sie ta, Zerepha khih kuh chhikao a kei ngia nahta nôhmei pakha tho pahrei vaw pakhyapa cha hmô ta, aw ta, "Ti do awpa na pie te" a tah. Nôhmeipa cha ti la awpa ta a vaw ngâ nota awsao heih ta, "Viachhâ a chyhta chhao na vaw cheipâ ma y" a tah. Nôhmeipa ta Elaiza hnohta, "Kei nata ei sawchapawpa châta beih liata viadi pazah kha deita nata a-ô liata sathaw a chyhta deita ei hnei" tahpa ta achâna dopa cha a chho. "Nôhmeipa" tahpa cha "Vahpa ta athi sai hawpa chanô" tagna yzie ahnei. Biehrai liata nôhmeipazy he sipasa viapazy châ tyh ei ta, chakâhna daihti a vaw tlô nata râh hro lâ pangaina liata hmiasatuhpazy ama châ.<sup>5</sup> Cha hawhta Zerepha nôhmeipa chhao he a bie reipa ngiâpa ta khihsatôtuna liata riethei kawpa chanô a châ ngyu aw. Kaohro lâ tawhta cha niedo kyh liata phahla myuhlapa chanô a châ. Châhrasala Elaiza ta, "Kei châta vaw tao tua la, cha khai tawhta nâma nata na sawchapawpa châta tao lava chi" a tah. Zerepha nôhmeipa ta Elaiza cha Khazohpa chyhsa a châ tahpa pahno ta, ano nata a sawchapaw châta sopa viadi nata sathaw zy cha Khazohpa chyhsa Elaiza châta a tao.

Elaiza cha nodi dâhphi kaw no ta nôhmeipa viadi nata ti cha do ta, a palôh tlâh ngâsâ ta, nôhmeipa châta byhnâ a aw. "ABEIPA ta alei chô liana heta vâsua a vaw pasuasa hlâ lei cha viadi beih cha

---

<sup>5</sup> Walvoord Zuck, *The Bible Knowledge Commentary: Old Testament* (Andhra Pradesh: India Reprint 2013), p. 524.

rua hlei leipa aw ta, a-ô liata sathaw chhao chhâ aw vei." Cha hawhta nôhmeipa, a chhôhkha nata Elaiza chhao ta no khazi lei cha tlyma nie ei ta, chakâhna kôzy cha ama khô khô haw. Cha hnô lâna chata nôhmeipa sawchapawpa cha tlâhleipa ta a hu cha chhâ haw ta, nôhmeipa cha a palôh pasa kaw ta, nôpo ngaita ta y ta, Elaiza lâ cha atlô khe. Elaiza ta a sawchapaw athi hawpa cha la ta, ABeipa lâta thlahchhâ ta, a sawchapaw cha a hu vaw hnei heih haw. Thina tawhta pahro heihpa a châ.

### **Biepachhâna**

Zisu hnoh a zituha chyhsa 5000 (Chanô nata hawti zy rei leipa ta) ri pabi no ta byhnâ a vaw châpa cha hawti a chyhta kha a châ (Zawhana 6:1-13). He liata hawti he kei ta cha kô nata thla lâ hawti-na hlâta chyhsa mohmô liata sawta ama rei âh leipa chyhsa lâta ei reih thai via tyh. Cha hawhta Zerepha nôhmeipa chhao he chyhsazy (Khisalâhpazy) mohmôna liata cha khâpa sawta rei tlâh a châ leipa chanô chhao a châ ngyu aw. Châhrasala, Khazohpa chyhsa Elaiza cha atheina hawhta deichhy ta, ano bie hawhta taohria ta, chazy vâna chata chakâhna ru kawpa cha khô khô ta, athi hawpa a sawchapawpa chhao cha pahro heihpa a châ. Khazohpa chyhsa deichhyna vâta nôhmeipa cha ano hrona â pabohsa hlei khô ta, a sawchapawpa hrona chhao a pabohsa.

### **REIPAHMAOHNA**

- 1) Local KTP heta Awnanopa chhituha (Pastor, Hyutuha) he khâpa kao lâ tawhta-zy eima deichhy thei chai aw?
- 2) Khei hawhpa Local KTP he ma Khazohpa ta ahmâh thai via aw?
- 3) Rairu chaina daihti liata mohropazy châta a piepasaina heta khathlu taihta byhnâ atlôkhei thei aw?

<p style="text-align: center;"><b>9 JUNE 2023</b> <b>Friday zâ</b></p>
--

**HNEINA TA KRISTA A CHAKAOPA THYUTLIA**  
**(Luka 8:3)**

**Biehmiapa**

Khazohpa ta Mara Awnanopa liata thyutliazy he khâpa ma miah âhnaw chai tahpa hiahripa châ mawh sala, hneina ta Krista chakaona tah hlei khô ta achhyna hropa pahno vana. He tlai he atahmâhlâ KTP ta eima peimawh chaipa a châ. 2020-2024 Awnanopa term eima sie ngâpa liata rairuna eimâ tyhpa mia (2) zy cha Covid-19 potlana nata Mynamar râh buana he a châ. Hezy vâta Local KTP hluhpi ta cha Central KTP ta âhnawpa target sôh zy pangiah thei khao leipa ei ta, Central KTP chakaona liata chhao a pahlo thei khao vei ei. Hezy vâna heta 2023 KTP Hâtâ & Aduanoh biepipa cha "Hneina ta Krista a Chakaopa Thyutlia" (Luka 8:3) tahpa biepipa atlyhpa a châ. Krista chakaona cha member eima chyhpa vâta arâsai awpa a châ tlyma, sôh eima rairupa vâta bâsai awpa chi a châ tlyma?

**Achhôhie**

MEC Awnanopa cha "Centralization Chhihthana" ta asie ngâpa Awnanopa a châ. "Centralization" tahpa yzie cha "Su liahsôhpa" tahna châ ta, "Zawpi Awnanopa Biehneina" ta a sie ngâpa Awnanopa tahna a châ. Âchhuahna chhao cha râh Awnanopa zawpi phana a châ. He hawhta a sie ngâ nona heta thokhazy ta "Localization Chhihthana" ta sie achhuahpa ama hluh ngaita kaw. "Localization" tahpa yzie cha "Kihichhôn" tahna châ ta, "Kihichhôn Awnanopa Biehneina" ta chhihthana tahna a châ. Âchhuahna chhao kihichhôn Awnanopa phana a châ. He Awnanopa a chhihthana mia (2) zy he a phana a y chyupa hawhta a pha leina chhao a y thei hra aw. Anodei MEC Awnanopa cha Awnanopa zawpi phana pachâpa ta



asie ngâpa châ ta, hmaohkha ta chakaona a pasâhsapa Awnanopa a châ. Chavâta Local KTP zydua pahlyhpa "Central KTP" chhao paduapa a châ. Central KTP âdua nawpa châta Assembly ta sôhnawh a tao.<sup>6</sup> Chazy hry liata Local KTP Target Sôh (LTS) nata Noh Peimawhpa Sôh (NPS): KTP Aduanoh & Hâtâ he sôhnaw-ipa châ ta, KTP Headquarter, Office lâ pangiah awpa a châ. Ahropazy cha Awnanopa dâh ta a pasaina hawhta hmâ awpa a châ.

### **Pahaona-1**

Atahmâ Awnanopa term 2020-24 eima sie ngâpa liata KTP châta pahaona lai kawpa miakhâna cha KTP Headquarters, Office lâ sôh pangiah khao leipa ta Local KTP phana deita pachâna (Localization) he a châ. 2020 kô liata Covid-19 potlana ta miah vaw chahry ta, Local KTP zy fund tluana y khao vei tahpa a châ. 2021 kô liata Myanmar râh Sawhkhâ buana a vaw thao heih ta, thyutlia hluhpi cha Burma pheisaih adyuna liata zy, râh hropa lâta zy pua hluh ei ta, KTP member y khao ma pi tahpa a châ heih. Chazy vâna chata Office lâ sôh angiahpa y khao vei. Local KTP zydua Office lâ sôh pangiah khao vei ei tahna deikua châ hlei vei. Local KTP thokhazy cha ama sôh thyuna a sâh ta, ama chakaona chhao khoh âchhih lymâ. Aly âchhih ngâsâ. Thokhazy deikua cha Office lâ sôh ama pangiah leipa chhao he pei tah hlei vei ei. Keimo tlai hena a so chaipa, a thô chaipa châ ngyu pi tahpazy tlaao ama pachâ hri. Chavâta Central KTP Ryureina liata Local KTP target sôh pachyh via awpa kyh zy rei ai tah vei ei. Local KTP Target sôh zy a y khao lei awpa hmah ama paphasa ngyu aw.

### **Pahaona-2**

Pahaona mianona cha KTP chakaona liata daithlâna/absent-na he a châ. Myanmar râh buana vâta Mararâh nata Marasawzy riethei eima tao tlai ma? Eima tao hmeiseih. Khisatôtuna liata zy,

---

<sup>6</sup> MEC Assembly Rules 2018 (Lailenpi/Sabawngpi: MEC, 2018), p. 327.

sievawna liata zy, kao hluhpi liata zy riethei eima tao tlai. Myanmar rân buana vâta riethei vâsâh a châna he zawpi pahno khaipa a châ. Myanmar rân chhôn apahrâpazy ama pahno via chai aw. Anodeikua thokhazy cha Myanmar rân buana he "chakaona diathlâna license (Pasaina)" hawhta ama hmâ. Atahmâ term liata KTP Meeting chhao he member tlohpa ta eima taopa y tla mâh vei. Ngiachhi âchhih hmeiseih. KTP Department dei châ hra ngyu vei. Awnanopa chakaotuhpa pakha châ ta, Meeting a-absent ngâ thlâh hâpa cha chyhsa thathipa châ ta, "Sâtâ/Lyurâhripa hmahta ahmâ khoh leipa chyhsa a châ." Thokhazy ta chakaona ama papeisa kaw nota thokhazy heih cha papeisa lei kawpa ta ama y thlâh hâ. Chakaona raihria liata diathlâna chi âchhizie Jeremiah ta he hawhta miah a chho. "Diathlâ ngaitapa ta ABEIPA rai a hriatuhpa cha chhiesapa ta a y aw" (Zer. 48:10).

### **Mopazihna**

MEC Awnanopa liata Local KTP padua theipa zydua (82) châ ta, member zydua 7560 rachhôn ama châ.<sup>7</sup> 2022 kô liata Local KTP Target raipa cha Ks. 9,500,000/- châ ta, pangiapa zydua Ks. 5,910,200/- deita a châ.<sup>8</sup> A vâtlâh ta eima chhu khiah, 2022 kô liata KTP mopakha thyuna cha  $(5910200 \div 7560) = 781$  a châ. Central KTP ahmahsie thei via nawpa ta keimo KTP zy chhao sôh eima thyu via awpa âbyuh! Eima sôh zy achhyna-o a tlôh khiah, eima palôhrupa chhao ABEipa lâ atlô aw. Hezy vâna heta Herawda sôh amokhâtuha Kuza lahpînô, Zôana zy, Susana zy nata ahropa Mari Madali zy, Mari zy, Zebadi sawchapawpa nô Salomi zy ta Zisu cha ama hneina sôh ta deichhy ei ta, Ano zituhpa chapaw hluhpizy ama pazi thei khao leina Kraws thaby taih ama zipa kha a châ ngyu aw.

<sup>7</sup> Rev. San Lwin, Atahmâhlâ MEC KTP Thâtih "ECM, CCIM, MEC KTP Joint Jubilee Celebration liata Report," (Siaha, 2022), p. 2.

<sup>8</sup> Mara Evangelical Church, "Ei (50) na General Assembly" (Lialai A, 2023), p. 107.

Zunawzy phôryhpa liata mohnao chhihpa chanôzy chhao hneina ta chakaona liata amopâtlâh ama châ thlâh hâ.

### **Biepachhâna**

Local KTP âduapa vâta Synod KTP adua thai ta, Local KTP âduapa vâ lilaw ta Central KTP aduapa a châ. A yzie cha Local KTP y leipa ta, Central KTP y thai vei tahna a châ. Local KTP heta Central KTP ta âhnawpa sôh zy a pangiah khao vei khiah, Central KTP cha aduah thei aw vei. Zawpi phana (Centralization System) pachâpa ta eima sie ngâ nota local sâkha phana (Localization System) a pachâpa cha hrozie nôchâ chhiepa châ ta, Sata hlâta a pahlei via. Cha hawhta Local KTP tota thyu tyhpa sôh athyu leipa nata tao tyhpa atao leipa cha "HNA Local KTP" a châ. "HNA" tahpa yzie cha "Atlâhleipa" tahna a châ. Chavâta Central KTP ta miah âhnawpazy cha phahnai khoh ngaitapa tao lymâ si la, unawhzy hmaohkha ta chakaona liata byhnâ a y tahpa vaw my kha ei!

### **REIPAHMAOHNA**

- 1) Office lâ sôh pangia thei leina chhâpazy paziah la, pangia theina lâthlô reih teh!
- 2) Meeting nata chakaona raihria liata adiathlâ (a-absent) tyhpa chyhsa he a-absent khao lei nawpa ta kheita eima tao aw? Lâthlô a y ma?
- 3) Nama Local KTP he khâpa Awnanopa chhihthana dâh a pasâhsapa e a châ.
  - a. Localization ta yna phahnaina nata phaleina reih teh!
  - b. Centralization ta yna phaleina nata phahnai rei teh!
  - c. Central KTP hmahsie thei nawpa ta Local KTP heta khâpa maohphaonazy ahnei?

**LOCAL KTP HÂTÂ & ADUANOH REPORT**

Târi: \_\_\_\_\_

Local KTP Moh: \_\_\_\_\_

**1. Chhihthana Bu Reina**

<p style="text-align: center;"><b>3 June 2023 (Saturday)</b></p> <p>Chhituhpa : _____                  Achu theipa : _____                  Sôh Hmôpa : _____</p>	<p style="text-align: center;"><b>4 June 2023 (Sunday)</b></p> <p>Chhituhpa : _____                  Achu theipa : _____                  Sôh Hmôpa : _____</p>
<p style="text-align: center;"><b>5 June 2023 (Monday)</b></p> <p>Chhituhpa : _____                  Achu theipa : _____                  Sôh Hmôpa : _____</p>	<p style="text-align: center;"><b>6 June 2023 (Tuesday)</b></p> <p>Chhituhpa : _____                  Achu theipa : _____                  Sôh Hmôpa : _____</p>
<p style="text-align: center;"><b>7 June 2023 (Wednesday)</b></p> <p>Chhituhpa : _____                  Achu theipa : _____                  Sôh Hmôpa : _____</p>	<p style="text-align: center;"><b>8 June 2023 (Thursday)</b></p> <p>Chhituhpa : _____                  Achu theipa : _____                  Sôh Hmôpa : _____</p>
<p style="text-align: center;"><b>9 June 2023 (Friday)</b></p> <p>Chhituhpa : _____                  Achu theipa : _____                  Sôh Hmôpa : _____</p>	<p style="text-align: center;"><b>Sôh Hmôpazy</b></p> <p>Hâta Ahmâna Sôh : _____                  KTP Aduahna Sôh : _____                  Zydua (NPS) : _____</p>

**2. Hâtâ Ahmâna Report**

- 1) \_\_\_\_\_
- 2) \_\_\_\_\_
- 3) \_\_\_\_\_

**3. Aduanoh Ahmâna Report**

- 1) \_\_\_\_\_
- 2) \_\_\_\_\_
- 3) \_\_\_\_\_

**4. Local KTP Member**

- Chapaw : \_\_\_\_\_
- Chanô : \_\_\_\_\_
- Zydua : \_\_\_\_\_

**Remark:** He report form he Hq. KTP Secretary lâta paphaopa châ aw ta, sôh deikua cha Biatuhpa siepahliehpa ta (Local KTP Sôh Avaona Dâh hawhta) Concern Office lâ paphaopa a châ aw.

Krista liata,  
 Local KTP Secretary moh: \_\_\_\_\_